


01 novambra 2020 Fankalazana ireo olomasina



Ry Kristianina havana, omaly isika no namarana ny volan'ny raozery izay nibanjinantsika ny misterin'ny famonjena antsika : misterin'ny fahatongavana ho nofo, misterin'ny famirapiratan'ny fahazavana, misterin'ny fijaliana izay nibanjinantsika an'i Jesoa manolotra ny ainy ho fanavotana antsika ary ny mistery be voninahitra izay hibanjinantsika miaraka amin'i Masina Maria ny fiainan-ko avy izay andrasantsika. Nandritra izay volana Oktobra volan'ny Rozery ihany koa no nandalinantsika ny volan'ny misiona ka namakafakantsika ny maha EO V MISIONERA ANTSIKA VITA BATEMY KA IRAHINA HO TABERNAKLA VELONA araka ny hafatr'I Papa hoe "Inty aho ka iraho". Volana oktobra

izay nidirantsika amin'ny TAONA PASTORALY VAOVAO KA HANAOVANTSIKA DEPART VAOVAO AO ANATIN'NY PANTEKOTY VAOVAO ao aorinan'ity KORONTANAVIRUS. Ny HAFATRA PASTORALY FAHA-8 no tondro zotra sy toro-lalana ho antsika. Androany alahady izany hoe raha ny mandavantaona dia alahady faha-30kanefa noho izy

Vakiteny I : Apôk. 7, 2-4. 9-14

Tononkira : Salamo 23

Vakiteny II : 1 Jo. 3, 1-3

Evanjely : Mt. 5, 1-12a

mifanandrify amin'ny 1 Novambra , fankalazana manetriketrika ny Fetin'ny Olomasina rehetra dia ny 1 Novambrano no ankalazantsika amin'ny fomba manetriketrika ireo havantsika tafita ka miombon-kasambarana ao amin'Andriamanitra na ireo amin'ny kalendrie na ireo tsy voasoratra nefa efa ao amin'ny fiadanana mandrakizay. Nahavita ny pakan'izy ireo niaraka tamin'I Jesoa nandresy ny fahafatesana. izay mampiditra antsika amin'ny volana novambra ihany koa ahatsiarovantsika ireo nialoha lalana antsika indrindra. Izany rehetra izany dia mampahatsiaro antsika fa any an-danitra any tokoa no tena fiainana. Ny fahafatesana sanatria tsy fiifarana na fahalevonana, tsy hoe levona mandrakizay isika, na i Kristy aza dia nandalo fahafatesana ary nandresy an'izany. I Masina Maria koa toy izany ary nampakarina vatana sy fanahy any an-danitra. Fahafatesana manambara fa

voafetra isika fa tsy fiafrana. Noharian'Andriamanitra misy fetra tokoa isika olombelona. Andriamanitra irery no tsy misy fetra, fitiavana Andriamanitra ka tiany isika hitovy endrika Aminy izany no nahariany antsika ka raha nandahatra an'izao tontolo izao sy nahary antsika olombelona Andriamanitra dia nohariany ho ao Aminy ka olona araiky ao Aminy tokoa isika fa isika olombelona no be siasia. Noho ny fahotana dia “potika “ izay fandaharan'Andriamanitra izay.

Izao voalohan'ny volana novambra izao dia hahatsiarovantsika ilay Jerosalema any an-danitra. Jerosalema midika tanana masina, tanan'ny fiadana. Mampahatsiaro fa an'i Jerosolama tokoa no iantsoan'antsika raha miombona amin'Andriamanitra, raha mivelona ny maha Kristianina isika, raha Kristy mpiara-belona amin'olona tokoa isika, raha EOVI MISIONERA isika. Ny vocation-ntsika dia ho any amin'izay misy an'i Kristy ao amin'Andriamanitra ka ity tany ity dia tany fandalovana ho entintsika miomana amin'ny fiainana lavorary izay iombonantsika amin'Andriamanitra dia ny hasambarana mandrakizay..

Ry Kristianina havana, mankalaza ny fetin'ny olomasina rehetra isika androany. Aoka ao antsaintsika rehetra fototra telo ireo : fankalazana ny voninahitr'Andriamanitra ny andor androany satria masina ireo olona ireo satria nibaribary tamin'ny alalan'izy ny voninahitr'Andriamanitra, faharoa mananao modely isika. Izany hoe natao ho an'ny olona rehetra ny fahamasinana. Fahatelo manana mpivavaka isika satria tian'izy ho tody any Jerosalema isika. Manaraka izany, Olomasina izy ireo satria niombona tamin'Andriamanitra satria ny atao hoe “masina” mira “miombona amin'Andriamanitra, ary izay fiombonana izay no averimberintsika matetika rehefa manazava ny fahamasinana isika . Nyy fahamasinana tokoa tsy hoe ireo voatsangana olomasina ihany fa ireo rehetra miombona hasambarana amin'Andriamanitra any an-danitra. Ny lahatra Andriamanitra ny hiombonantsika Aminy amin'ny Trinite masina.

Izany no antitranterin'ireo vakiteny atolotry ny Eglizy androany na ny bokin'ny fanambarana amin'ny vakiteny voalohany izay anehoan'i Md Joany fa nahita famantarana izy ka ireo izay nanadio ny akanjony, izany hoe ireo izay niezaka namolaka ny tenany, nampiray ny tenany amin'Andriamanitra, ka ilay fahotana tsy miala amintsika dia nodiovin'Andriamanitra miaraka amin'ny fahasoavany ka nahatonga ireo marobe voalaza ao amin'ny Apokalipsa miombona Aminy rehefa madio. Raha teo teny hafa araka ny hafatra pastôraly faha 8 dia olon'ny finoana ireo satria niezaka nihaino sy nantanteraka ny sitrapon'Andriamanitra, olon'ny fitiavana niezaka nivelona araka I Kristy, olon'ny fanantenana ka na dia maro aza ny sedra sy ny fijaliana dia nampiombona azy ireo bebe kokoa tamin'i Jesoa nijaly ka zary famonjena ho an'ny hafa. Masina miaraka Amini Jesoa isika tsy noho ny fahamendrentsika fa noho ny fahasoavana nentin'i Kristy, noho ny ran'ny zanak'ondry dia i Kristy izay nanolotra ny ainy ka manome antsika ny ainy. Raha mandray ny ainy isika dia madio ary mizara izay aina izay amin'ireo manodidina antsika isika mba ho tena generation manorina, manavao, mandavorary isika.

Mbola manamafy izany ny vakiteny faharoa "*Ry hava-malala, zanak'Andriamanitra isika ankehitriny, nefa mbola tsy naseho izay ho tena toetrantsika; fa amin'ny andro hampisehoana izany, dia fantatsika fa hanahaka Azy isika, satria hahita Azy araka ny tena toetrany. Izay rehetra manana izany fanantenana izany ao aminy dia manadio ny tenany mba ho madio tahaka Azy.*"

Mampahatsiahy antsika ny toetra maha-zanak'Andriamanitra izany, fototry ny fahamasinana dia ny batemy. Aoka iainantsika tokoa ny batemy fa tsy hoe milaza fotsiny vita batemy aho, raha tena miaina an'izany isika dia miombona amin'i Kristy dieny ety an-tany, EOVI MISIONERA, Eglizy Olona Velona ka hatramin'ny fiainana mandrakizay. Izany no ampianarin'i Md Joany amintsika amin'io vakiteny faharoa io. Manambara koa izy fa tsy mijanona fotsiny amin'ny famaritana maha zanaka isika fa ny fanahafana an'i Kristy ny fahamasinana, kristianina dia i Kristy mpiara-belona amin'olona ka hahazoantsika tanteraka ny fiombonana amin'i Kristy.

Ny Evanjely nosoratan'i Md Matio amin'izao Alahady faha-30 mandavataona izao dia mampianatra antsika fa ny fanahafana an'i Kristy dia mitaky fanetrentena sy fahtsorana mba ho tena mpanompo marina. Io fanompoana io tokoa no lalana marimpototra amin'ny fahamasinana. Io no azo amintisinina ireo fahasambarana 8 lazain'i Jesoa ao amin'ny Evanjely, Toriteny teny antendrombohitra. Raha azontsika tsara ny tian'i Jesoa ambara dia tsy araka ny hevitr'izao tontolo izao ny hasambara volaza eto. Tsy hoe fananana harena ny hasambarana, izany manko ny hevitr'izao tontolo izao rehefa hoe manana an'izao aho dia ho sambatra. Tsy izany ny fahasambarana fa ny toetranao manahaka an'i Kristy izany hoe ireo toetra valo nananan'i Kristy ary tsy hoe nanao kobaka am-bava izy fa toetra tena nananany sy niainany ireo fahasambarana valo ireo.

Raha ny marimarina kokoa dia sivy fa ny fahasivy mamintina ireo hasambarana valo satria izao tontolo izao tsy manaiky ka manilikilika, izany no mahatonga an'i Jesoa miteny hoe : *"Sambatra ianareo raha tevatevaina sy enjehina ary ampangaina lainga amin'ny ratsy rehetra noho ny amiko"*

Io ny "critère" hahafantarana fa manahaka an'i Kristy isika raha enjehina satria izao tontolo izao tsy manaiky an'io toetra io izay hanahafantsika an'i Kristy dia ilay lazain'i Kristy hoe :

"Sambatra ny mahantra am-panahy fa azy ny fanjakan'ny lanitra"

Raha mirehareha amin'ny fananana izay tsy voatery ho vola aman-karena fa ny toetrantsika, io no tsy maintsy ho folahina mba hananana an'izay fahantrana sy fahalemam-panahy. Izany hoe miandrindra mandrakariva ny tena toetra maha zanak'Andriamanitra mba ho fenoin'Andriamanitra ny fo amam-panahy ka izany ny fanjakan'ny lanitra ho antsika.

"Sambatra ny malemy fanahy fa izy no handova ny tany", izay nohalalinintsika tamin'ny JMJ, io no lalana hanavaozantsika ity tany ity mba ho tranoben'Andriamanitra raha samy malemy fanahy isika ka generation mpanorina, mpanatsara, mpandavorary fa tsy mpanapotika.

"Sambatra izay mitomany fa alana alahelo izy", Malahelo ny ratsy. Io no lazain'i Papa mangataha mba hanana ranomason'alahelo manenina ny ratsy natao sy izay ratsy amin'ny manodidina. Andriamanitra no hanala alahelo antsika izany hoe ny fampianaran'i Kristy no manampy antsika hitraka, maro ny fananarana azontsika amin'ny alalan'ny fampianarany.

"Sambatra izay noana sy mangetaheta ny fahamarinana fa ho voky izy", ny fahantrana mikiky ny firenentsika. Vokatry ny tsy fisian'ny marina ireny kere ireny. Noho ny tsy rariny, tsy ny risoriso dia mitomba ny fahantrana. . Raha tiantsika ho resy ny fahantrana dia mila manao ny marina, aoka hampanjaka ny marina. Raha tiantsika ho marina ny fiainantsika dia aoka isika hanahaka an'i Kristy satria ny marina no maha olona afaka antsika, izany no tena fahendrena dia ny fahendren'i Kristy.

"*Sambatra izay mamindra fo*", nohalalinintsika io tamin'ny taonan'ny famindram-po, toetra manambara fa Kristy mpiara-belona amin'olona tokoa isika raha manatanteraka ireo asa famindram-po eo amin'ny fiainantsika na ara-panahy na ara-nofo na ara-tsaina, eo koa ny fikolokoloana ny tontolo iainantsika izay no manambara fa mamindra fo tokoa isika. Matetika ny Papa no manambara fa tsy hahita fiadana sy fandriamapahelmana isika raha tsy mamboly fifamelankeloka sy famindramp

"*Sambatra ny madio fo hahita an'Andriamanitra*. Ireo olona masina ankalazaintsika dia tena nadio ny akanjony, ny ankanjo dia ny fontsika voadio ary i Masina Maria no modely ho antsika amin'izany.

"*Sambatra ny tia fihavanana*", io toetran'i Kristy io no andrandraintsika Malagasy. Soatoavina ho antsika ny fihavanana. Averrimberina matetika. Aoka hitafy an'I Kristy. Izy no fihavanantsika hoy Md Paoly. Tsy ho hisy ny fihavanana raha tsy mahafofy. I Kristy nanolotra ny tenany. Manana modely isika, dia i Lucien Botovasoa Rabefihavanana no niantsoana azy noho izy miezaka hadio fo sy hampihavana tamin'ny fiainany. Enga anie isika haka tahaka azy amin'ny fanarahan-dia an'i Kristy.

Sambatra ny miaritra ny fanenjehena noho ny Amiko Tsy tadiavina ny fanenjehena fa noho ny lojika roa tsy mitovy dia aza gaga raha voatositosika izay mitafy an'I Kristy

Marina fa mety manahirana izany rehetra izany fa efa nambaran'i Kristy fa izany no làlan'ny hasambarana. Na izy koa aza niaina sy nivelona an'izany ka modely manambara amintsika ny làlan-kombana izy, izay mitondra antsika any amin'ny fiainana mandrakizay izay hitoerantsika satria any no iantsoan'Andriamanitra antsika.

Ry Jesoa Kristy Tompo ô, ampio ary izahay hanamasina ny fiainanay. Enga anie izahay ho Kristy mpiara-belona tokoa eo amin'ny mpiara-belona aminay. Hivavaka izahay ho an'ny olombelona rehetra fa indrindra ny mpitondra mba hanamasina ny tenany sy ity tany ionenany, tranobe iombonanay ity. Enga anie ny fiainanay hanahaka ny fiainanao araky ny toriteny nataonao teny antendrombohitra, Mba ho toetranay tokoa ireo hasambarana valo ka amin'izay ny iainanay eto mba hiainanay koa any amin'ny fiainana mandrakizay hahazoanay ny hasambarana tena izy sy ny hafaliana tena lavorary miaraka amin'ireo olomasina rehetra izay hivavaka ho anay koa amin'ny ezaka rehetra ataonay.

Masina Maria ô efa tafita ianao miaraka amin'ireo Olomasina ka mivavahà ho any mba hitafy an'I Kristy izahay ka ho EOV MISIONERA TOKOA HO TABERNAKLA VELONA HIZARA NY FAMINDRAMPON'I JESOA ZANAKA Amen

Mompera Arseveka Mgr Benjamin Ramaroson